



Ukubwa wa Kafara Yake

Na kama saa tisa, Yesu akapaza sauti yake kwa nguvu akisema,....Mungu wangu, Mungu wangu, mbona umeniacha?—**Mathayo 27:46.**

Wakati wanaume na wanawake watakapoweza kuelewa kikamilifu zaidi ukubwa wa kafara iliyo kuu iliyofanywa na huyu Mkuu wa mbinguni katika kufa kwa niaba ya mwanadamu, ndipo mpango wa wokovu utakapokuzwa, na tafakuri za Kalvari zitakapoibua hisia za wema, utakatifu na uhai moyoni mwa Mkristo. Sifa kwa Mungu na kwa Mwana – Kondoo zitakuwa mioyoni mwao na midomoni mwao. Kiburi na hali ya kujitukuza nafsi haviwezi kushamiri katika mioyo inayodumisha kumbukumbu za matukio ya Kalvari. Dunia hii itaonekana kuwa na thamani ndogo sana kwa wale wanaothamini gharama kuu iliyolipwa kwa ajili ya ukombozi wa mwanadamu, damu ya thamani ya mwana mpendwa wa Mungu. Utajiri wote wa ulimwengu hauna thamani ya kutosha ya kuikomboa nafsi moja inayoangamia. Ni nani awezaye kupima upendo wa Kristo aliouhisi kwa ajili ya ulimwengu uliopotea alipokuwa amening'inia msalabani, akiteseka kwa ajili ya dhambi za wenye hatia? Upendo huu haupimiki, hauna kikomo.

Kristo ameonesha kwamba upendo Wake una nguvu kuliko mauti. Alitimiza wokovu wa mwanadamu; na ingawa alikuwa na pambano la kutisha kuliko yote dhidi ya nguvu za giza, bado, katikati ya hayo yote, upendo Wake ulikuwa na nguvu zaidi na zaidi. Alistahimili kufichwa kwa uso wa Baba Yake, hadi pale alipoongozwa kusema katika uchungu wa nafsi Yake: “Mungu wangu, Mungu wangu, mbona umeniacha?” Mkono Wake ulileta wokovu. Gharama ililipwa ili kupata ukombozi wa mwanadamu, wakati ambapo katika pambano la mwisho la nafsi, maneno ya baraka yalitamkwa, yaliyoonekana kuwa na mwangwi katika uumbaji wote: “Imekwisha”...

Wembamba, upana, urefu na kina cha upendo wa namna hiyo hatuwezi kuvielewa. Tafakuri ya kina hicho kisicho na kifani cha upendo wa Mwokozi yapasa ijaze akili yetu, iguse na kuyeyusha roho, isafishe na kukuza mapenzi yetu na kubadilisha kabisa tabia yote...

Kristo hakushindwa hata kidogo kwa adui mtesaji, hata katika maumivu machungu kabisa. Majeshi ya malaika waovu yote yalikuwa yamemzingira Mwana wa Mungu, licha ya hivyo, malaika watakatifu walielekezwa wasitoke katika safu zao na kuingia katika pambano dhidi ya adui mwenye dhihaka na mwenye kushutumu. Malaika wa mbinguni hawakuruhusiwa kuhudumia roho iliyokuwa taabuni ya Mwana wa Mungu. Ilikuwa katika saa hii mbaya ya giza, uso wa Baba Yake ukiwa umefichwa, majeshi ya malaika waovu yakiwa yamemzingira, dhambi za dunia zikiwa juu Yake, ndipo maneno yalipomtoka midomoni mwake: “Mungu wangu, Mungu wangu, mbona umeniacha?”....

Inatupasa tuchukue mitazamo mipana zaidi na yenye kina zaidi ya maisha, mateso na kifo cha Mwana mpendwa wa Mungu. Wakati upatanisho unapotazamwa kwa usahihi, wokovu wa roho za watu utahisika kuwa wenye thamani isiyopimika. Katika kulinganishwa na jambo kubwa la uzima wa milele, mengine yote yanazama hadi kufikia hatua ya kutokuwa na thamani (Testimonies For The Church 2:212-215).